

四庫全書

集部

欽定四庫全書

集部
御選歷代詩餘卷六十二

詳校官中書臣潘有為

侍讀臣孫球覆勘

總校官進士臣朱鈐

校對官學政臣翁樹棠

謄錄監生臣閻學朱

欽定四庫全書

御選歷代詩餘卷六十二目錄

起九十六字
至九十七字

漢宮春

又一體

張先

前調

又一體

晁冲之

周紫芝

二首

李邴

辛棄疾
六首

京鏜

陸游
二首

劉鎮

史達祖

方岳

吳文英
二首

前調
又一體

康與之

雨中花

又一體

京鏜

前調

又一體

無名氏

聲聲慢

又一體

元好問

早梅香

無名氏

望雲間

趙可

醉蓬萊

又一體

盧炳

前調

又一體

王沂孫

雙雙燕

吳文英

鳳凰臺上憶吹簫

又一體

晁補之

前調

又一體

吳元可

前調

又一體

沈懋德

劍氣近

袁去華

步月

又一體

史達祖

帝臺春

又一體

李甲

熙州慢

張先

黃鶯兒

柳永

晁補之

王詵

粉蝶兒慢

周邦彥

采明珠

杜安世

倦尋芳

欽定四庫全書

御選歷代詩餘

卷六十二目錄

四

王雱

陽臺路

柳永

水調歌頭

又一體

何夢桂

塞垣春

周邦彥

方千里

陳允平

八聲甘州

又一體

柳永

蘇軾

晁補之

二首

向子諲

葉夢得

二首

朱雍

張鎰

辛棄疾

二首

程垓

汪莘

趙希邁

吳文英

二首

周密

二首

張炎

六首

趙文

張翥

張埜

陸釋麟

御選歷代詩餘卷六十二目錄

欽定四庫全書

御選歷代詩餘卷六十二

起九十六字
至九十七字

司經局洗馬掌局事兼翰林院修撰加二級臣王奕清奉

百校刊

漢宮春

又一體雙調九十六字一名慶千秋
首句與換頭叶韻與否無定格也

漢宮春

蠟梅

張先

紅粉苔牆透新春消息梅蕊先芳奇葩異卉漢家宮額

塗黃何人鬪巧運紫檀翦出蜂房應爲是中央正色東
君別與清香 仙姿目稱霓裳更孤標俊格霏雪凌霜
黃昏院落爲誰密解羅囊銀瓶注水浸數枝小閣幽牕
春睡起纖條在手厭厭宿酒殘妝

前調

又一體

晁冲之

黯黯離懷向東門繫馬南浦移舟薰風亂飛燕子時下
輕鷗無情渭水問誰教日日東流常是送行人去後煙
波一晌離愁 回首舊遊如夢記踏青殢飲拾翠狂遊

無端綵雲易散覆水難收風流未老撩千金重入揚州
應又似當年載酒依前名占青樓

前調

周紫芝

秋意還深漸銀牀露冷梧葉風高嬋娟也應爲我羞照
霜毛流年老盡漫銀蟾冷浸香醪須盡把平生怨感一
時分付離騷傷心故人千里問陰晴何處還記今宵
樓高共誰同看玉桂煙梢南枝鵲繞歎此生飄轉江皋
須更約他年清照爲人常到寒霄

前調

題山谷反
魂梅香

周紫芝

香滿箱奩看沈犀弄水濃麝含薰荀郎一時舊事盡屬
王孫殘膏賸馥須傾囊乞與蘭蓀金獸暖雲牕霧閣爲
人洗盡餘醺依稀雪梅風味似孤山盡處馬上煙邨
從來甲煎淺俗那忍重聞蘇臺燕寢下重幃深閉孤雲
都占得橫斜亂影伴他月下黃昏

前調

李邴

瀟灑江梅向竹梢疎處橫兩三枝東風也不愛惜雪壓

霜欺無情燕子怕春寒輕失花期惟是有南來塞鴈年
年長見開時清淺小谿如練問玉堂何似茅舍疎籬
傷心故人去後冷落新詩微雲澹月對孤芳分付伊誰
空自倚清香未減風流不在人知

前調

立春

辛棄疾

春已歸來看美人頭上裊裊春幡無端風雨未肯收盡
餘寒年時燕子料今宵夢到西園渾未辦黃柑薦酒更
傳青韭堆盤却笑東風從此便熏梅染柳更沒此閒

閒時又來鏡裏轉變朱顏清愁不斷問何人會解連環
生怕見花開花落朝來塞鴈先還

前調

即事

辛棄疾

行李谿頭有釣車茶具曲几團蒲兒童認得前度過者
籃輿時時照影甚此身徧滿江湖悵野老行歌不住定
堪與語難呼 一自東籬搖落問淵明歲晚心賞何如
梅花政自不惡曾有詩無知翁止酒待重教蓮社人沽
空悵望風流已矣江山特地愁余

前調

會稽蓬萊閣

辛棄疾

秦望山頭看亂雲，急雨倒立江湖。不知雲者爲雨，雨者雲乎？長空萬里，被西風變滅，須臾回首，聽月明天籟人間。萬竅號呼，誰向若邪溪上，倩美人西去，麋鹿姑蘇。至今故國人望一舸歸歟？歲云暮矣，問何不鼓瑟吹竽？君不見王亭謝館，冷煙寒樹啼鳥。

前調

會稽秋風亭

辛棄疾

亭上秋風記去年，娟娟曾到吾廬。山河舉目雖異風景。

欽定四庫全書

御選歷代詩餘

非殊功成者去覺團扇便與人疎吹不斷斜陽依舊茫
茫禹跡都無 千古茂林猶在甚風流章句解擬相如
只今木落江冷渺渺愁余故人書報莫因循忘却蓴鱸
誰念我新涼燈火一編太史公書

前調

答李兼善
提舉和章

辛棄疾

心似孤僧更茂林修竹山上精廬維摩定自非病誰遣
文殊白頭自惜歎相逢語密情疎傾蓋處論心一語只
今還有公無 最喜陽春妙句被西風吹墮金玉鏗如

夜來歸夢江上父老歡余荻花深處喚兒童吹火烹鱸
歸去也絕交何必更修山巨源書

前調

答吳子似
總幹和章

辛棄疾

達則青雲便玉堂金馬窮則茅廬逍遙小大自適鵬鷃
何殊君如星斗燦中天密密疎疎荒草外自憐螢火清
光暫有還無 千古季鷹猶在向松江道我問訊何如
白頭愛山不去翁定嗔余人生謾爾豈食魚必膾之鱸
還自笑君詩頻覺胸中萬卷藏書

前調

上元前一
日立春

京鏜

暖律初回又燒燈市井賣酒樓臺誰將星移萬點月滿
千街輕車細馬隘通衢蹴起塵埃今歲好土牛作伴挽
留春色同來不是天公省事要一時壯觀特地安排
何妨綵樓鼓吹綺席尊壘良宵勝景語邦人莫惜徘徊
休教我癡頑不去年年爛醉金釵

前調

張園賞
海棠

陸游

浪迹人間喜聞猿楚峽學劒秦川虛舟汎然不繫萬里

江天朱顏綠鬢作紅塵無事神仙何妨在鶯花酒裏行
歌閒送流年 休笑放慵狂眼看閒坊深院多少嬋娟
燕宮海棠夜宴花覆金船如椽畫燭酒闌時百炬吹煙
憑寄語京華舊侶幅巾莫換貂蟬

前調

自南鄭來
成都作

陸游

羽箭雕弓憶呼鷹古壘截虎平川吹笳暮歸野帳雪壓
青氊淋漓醉墨看龍蛇飛落蠻牋人誤許詩情將略一
時才氣超然 何事又作南來看重陽藥市元夕燈山

花時萬人樂處，敔帽垂鞭，聞歌感舊。尚時時流涕尊前。君記取封侯事，在功名不信由天。

前調

鄭賀守席上懷舊

劉鎮

日軟風柔，望暖江連島，晴綠平川。尋芳拾蕊，勝伴陌上鮮妍。玉驄歸路，記青門曾墮吟鞭。人去後，庭花弄影，一簾香月娟娟。追念舊游何在，歎佳期虛度，錦瑟華年。博山夜來燼冷，誰換沉煙。屏幃半掩，奈夢雲不到愁邊。春易老，老相思，無據閒情，分付魚牋。

前調

代友
寄情

史達祖

花隔東垣詠燕臺秀句結帶謀歡匆匆舊盟有限飛夢
重闕南塘夜月照湘琴別鶴孤鸞天使遣清愁易長春
衣常恁香寒唐昌故宮何許頓翦霞裁霧擺落塵緣
一聲步虛婉婉雲駐天壇淒涼故里想香車不到人間
羞再見東陽帶眼教人依舊思凡

前調

探梅

方岳

問訊何郎怎春風未到却月橫枝當年東閣詩興天豈

吾欺雲寒歲晚便相逢已負深期須說與秋崖歸也留
香更待何時 家住江南煙雨想疎花開徧野竹筵籬
遙憐水邊石上煞欠渠詩月臺雪甕肯相從捨我其誰
應自歎生來孤峭此心却有天知

前調

牡丹

吳文英

花姥來時帶天香國豔羞掩名姝日長半嬌半困宿酒
微蘇沉香檻北比人間風異煙殊春恨重盤雲墜髻碧
花翻唾瓊盃 洛苑舊移仙譜向吳娃深館曾奉歡娛

猩脣露紅未洗客鬢霜鋪蘭池沁壁過西園重載雙壺
休謾道花扶人醉醉花却要人扶

前調

壽梅
津

吳文英

名壓年芳倚竹根新影獨照清漪十年禹梁蘚碧重發
南枝冰凝素質遣凡桃羞濯塵姿寒正峭東風似海香
浮夜雪春霏練鵲錦袍仙使有青娥傳夢月轉參移
逋山傍鷺繫馬玉翦新辭宮妝鏡裏笑人間花訊都遲
春未了紅鹽薦鼎江南煙雨黃時

前調

又一體
寧殿元夕
慈

康與之

雲海沉沉峭寒收建章雪殘鳩鵲華燈照夜萬井禁城
行樂春隨鬢影映參差柳絲梅萼丹禁杳鼇峰對聳三
山上通寥廓春衫繡羅香薄步金蓮影下三千綽約
冰輪桂滿皓色冷侵樓閣霓裳帝樂奏昇平天風吹落
留鳳輦通宵宴賞莫放漏聲閒却

雨中花

又一體雙調九十
六字或加慢字

雨中花

京鏗

玉局祠前銅壺閣畔錦城藥市爭奇正紫萸綴席黃菊
浮巖巷陌連鑣並轡樓臺吹竹彈絲登高望遠一年好
景九日佳期自憐行客猶對佳賓留連豈是貪癡誰
會得心馳北闕興寄東籬惜別未催鷓首追歡且醉蛾
眉明年此會他鄉今日總是相思

前調

又一體

無名氏

事往人翻還似暮峽歸雲壠上流泉奈向分圓鏡已斷

么絃長記酒闌歌罷難忘月夕花前相攜手處瓊樓朱
戶觸目依然從來慣共繡幃羅帳鎮效比翼文鴛誰
念我而今清夜常是孤眠入戶不知飛絮傍懷爭及爐
煙這回去也一生心事爲你縈牽

聲聲慢

又一體雙調
九十六字

聲聲慢

元好問

林間鷄犬江上邨墟扁舟處處經過袖裏新詩買斷古

木滄波山中一花一草也留教老子婆婆任人笑風雲
氣少兒女情多不待求田問舍被朝吟暮醉慣得蹉
跎百尺高樓更問平地如何朝來斜風細雨喜紅塵不
到漁蓑一尊酒喚元龍來聽浩歌

早梅香

雙調九
十六字

早梅香

本意

無名氏

北帝收威又探得早梅漏春消息粉蕊瓊苞擬將臙脂

輕染顏色素質盈盈終不許雪霜欺得奈化工偏宜賦
與壽陽妝飾 獨自逞冰姿比天桃繁杏殊別爲報山
翁逢此有花尊前且須攀折醉賞吟戀莫孤負好天風
月恐笛聲悲紛紛便似亂飛香雪

望雲間

一名望海潮雙
調九十六字

望雲間

代州
南樓

趙可

雲朔南陲全趙寶符河山襟帶名藩有朱樓縹緲千雉

回旋雲度飛狐絕險天圍紫塞高寒弔興亡遺跡咫尺
西陵煙樹蒼然時移事改極目春心不堪獨倚危闌
惟是年年飛鴈霜雪知還樓上四時長好人生一世誰
閒故人有酒一尊高興不減東山

醉蓬萊

又一體雙調
九十六字

醉蓬萊

上南安
太守

盧炳

正春回紫陌瑞靄飛浮暖風輕扇皓月初圓覺嚴城寒

淺綵結鰲山紗籠銀燭與花爭豔午夜融和紅蓮萬頃
一齊開徧 訟簡民熙使君行樂簇擁朱輪旌旗輝煥
鼎沸笙歌過行雲不散咫尺泥封促朝天陞侍玉皇香
案來歲元宵龍燈影裏金杯宜勸

前調

又一體
歸故山

王沂孫

埽西風門逕黃葉凋零白雲蕭散柳換枯陰賦歸來何
晚爽氣霏霏翠蛾睂嫵聊慰登臨眼故國如塵故人如
夢登高還嬾 數點寒英爲誰零落楚魄難招暮寒堪

攬步履荒籬誰念幽芳遠一室秋燈一庭秋雨一聲秋
鴈試引芳尊不知消得幾多依黯

雙雙燕

雙調九十六字宋史達祖作詠燕詞即名其
調曰雙雙燕此詞少二字又後人所損也

雙雙燕

本意

吳文英

小桃謝後雙雙燕飛來幾家庭戶輕煙曉暝湘水暮雲
遙度簾外餘寒未捲共斜入紅樓深處相將占得雕梁
似約韶光留住堪舉翩翩翠羽楊柳坼泥香半和梅

雨落花風軟戲從亂紅飛舞多少呢喃意緒盡日向流
鶯分訴還過短牆誰會千言萬語

鳳凰臺上憶吹簫

又一體雙調
九十六字

鳳凰臺上憶吹簫

羊山迎
次膺

晁補之

千里相思況無百里何妨暮往朝還又正是梅初澹泞
禽未緜蠻陌上相逢緩轡風細細雲日斑斑新晴好得
意未妨行盡青山應攜後房小妓來爲我盈盈對舞

花間便擽了松醪翠滿蜜炬紅殘誰信輕鞍射虎清世裏曾共人間都休說簾外久春寒

前調

又一體

吳元可

更不成愁何曾是醉豆花雨後輕陰似此心情自可多了閒吟秋在西樓西畔秋較淺不似情深夜來月爲誰瘦小塵鏡羞臨彈箏舊家伴侶記鴈啼秋水下指成音聽未穩當時自誤又況如今那是柔腸易斷人間事獨此難禁雕籠近數聲別似春禽

前調

又一體
雨重陽

風

沈懋德

每遇重陽嘗攜佳客東郊逐隊登高看碧空雲靜鴈陣
蕭蕭著帽丹楓數點催好句試共推敲又何必雙攜紅
袖醉盡醇醪 飄飄今年風雨偏當落帽日阻却征輶
聊自弄柔翰擬答人嘲幸有東籬黃菊獨永我今夕今
朝任從他茱萸紅滿雨裏笑吾曹

劍氣近

雙調九
十六字

劍氣近

袁去華

夜來雨願倩得東風吹住海棠正妖嬈處且留取悄庭
戶試細聽鶯啼燕語分明共人愁緒怕春去 佳樹翠
陰初轉午重簾未捲乍睡起寂寞看風絮偷彈清淚寄
煙波見江頭故人爲言憔悴如許彩牋無數去却寒暄
到了渾無定據斷腸落日千山暮

步月

又一體雙調
九十六字

步月

本意

史達祖

翦柳章臺問梅東閣醉中攜手初歸逗香簾下璀璨縷
金衣正依約冰絲射眼更在苒蟾玉西飛輕塵外雙鴛
細蹙誰賦洛濱妃 霏霏紅霧繞步搖共鬢影吹入花
圍管絃將散人靜燭龍稀泥私語香櫻乍破怕夜寒羅
韞先知歸來也相偎未肯入重幃

帝臺春

又一體雙調
九十六字

帝臺春

李甲

芳草碧色萋萋徧南陌暖絮亂紅也知人春愁無力憶
得盈盈拾翠侶共攜賞鳳城寒食到今來海角逢春天
涯爲客愁旋釋還似織淚暗拭又偷滴漫倚徧危闌
儘黃昏也只是暮雲凝碧揀則而今已揀了忘則怎生
便忘得又還問鱗鴻試重尋消息

熙州慢

雙調九
十六字

熙州慢

贈述古

張先

武林鄉占第一湖山詠畫爭巧驚石飛來倚翠樓煙靄
清猿啼曉況值禁垣師帥惠政流入歡謠朝暮萬景寒
潮弄月亂峰回照天使尋春不早併行樂免有花愁
花笑持酒更聽紅兒肉聲長調瀟湘故人未歸但目送
遊雲孤鳥際天杪離情盡寄芳草

黃鶯兒

雙調九
十六字

黃鶯兒

本意

柳永

園林晴晝誰爲主
暖律潛催幽谷暄
和黃鸝翩翩乍遷
芳樹觀露濕縷金
衣葉映如簧語
曉來枝上絲蠻似把
芳心深意低訴
無據乍出暖煙來
又趁遊蜂去恣狂
蹤跡兩兩相呼
終朝霧吟風舞
當上苑柳濃時
別館花深處
此際海燕偏饒
都把韶光與

前調

晁補之

南園佳致偏宜暑
兩兩三三脩竹
新筍初齊
猗猗過簷

侵戶聽亂颭芰荷風細灑梧桐雨午餘簾影參差遠林
蟬聲幽夢殘處凝竚既往盡成空暫遇何曾住算人
間事豈足追思依依夢中情緒觀數點茗浮花一縷香
盈炷怪來人道陶潛做得羲皇侶

前調

王詵

多情春意花時節北園人來傳說江梅依稀芳姿數枝
新發誇嫩臉著胭脂骨凝香雪問伊還記年時正好
相看因甚輕別情切往事散浮雲舊恨成華髮算伊

空對綺檻雕闌攷望人攀折愁未見苦思量待見重
端疊願與永效高唐雲雨芳菲月

粉蝶兒慢

雙調九

十六字

粉蝶兒慢

周邦彥

宿霧藏春餘寒帶雨占得羣芳開晚豔初弄秀倚東風
嬌嬾隔葉黃鸝傳好音喚入深叢中探數枝新比昨朝
又早紅稀香淺 眷戀重來倚檻當韶華未可輕辜雙

眼賞心隨分樂有清尊檀板每歲嬉遊能幾日莫使一聲歌欠忍因循片花飛又成春減

采明珠

雙調九

十六字

采明珠

杜安世

雨乍收小院塵消雲澹天高露冷坐看月華生射玉樓清瑩蟋蟀鳴金井下簾幃悄悄空階敗葉墜風惹動閒愁千端萬緒難整秋夜永涼天迥可不念光景嗟薄

命條忽少年忍教孤另燈閃紅牕影步迴廊嬾入香閨
暗落珠滿面誰人知我爲伊成病

倦尋芳

雙調九

十六字

倦尋芳

王雱

露晞向曉簾幙風輕小院閒晝翠徑鶯來驚下亂紅鋪
繡倚危樓登高榭海棠著雨臙脂透萼韶華又因循過
了清明時候倦遊讌風光滿目好景良辰誰共攜手

恨被榆錢買斷兩眉長
鬪憶得高陽人散後
落花流水仍依舊
這情懷對東風盡成消瘦

陽臺路

雙調九
十六字

陽臺路

柳永

楚天晚墜冷風敗葉疎紅零亂
冒征塵匹馬區區愁見
水遙山遠追念年時正恁
鳳幃倚香偎煖嬉遊慣又豈
知前歡雲雨分散
此際空勞回首望京洛難收淚眼

暮煙衰草算暗鎖路岐無限今宵又依前寄宿甚處葦
邨山館寒燈半夜厭厭憑何消遣

水調歌頭

又一體雙調
九十六字

水調歌頭

何夢桂

對千峰未曉聽西風吹角下譙樓擁貔貅千騎旌幢十
里送客芳洲曾是燈棊月析簪畫坐青油折盡長亭柳
莫繫行舟憶昔相逢何處看飛鴻雪跡休更回頭百

年心事長逐水東流願君如遊龍萬里我如雲終泊此
林丘相思夢明年鴈到尚訊南州

塞垣春

雙調九
十六字

塞垣春

周邦彥

暮色平分野傍葦岼征帆卸煙深極浦樹藏孤館秋景
如畫漸別離氣味難禁也更物象供瀟灑念多才渾衰
減一懷幽恨難寫追念綺牕人天然自風韻閒雅竟

夕起相思謾嗟怨遙夜又還將兩袖珠淚沉吟向寂寥
寒燈下玉骨爲多感瘦來無一把

前調

次周美成韻

方千里

四遠天垂野向晚景雕鞍卸吳藍滴草塞繇飛柳風物
堪畫對雨收霧霽初晴也正陌上煙光灑聽黃鸝啼紅
樹短長音調如寫懷抱幾多愁年時趁歡會幽雅盡
日足相思奈春晝難夜念征塵堆滿襟袖那堪更獨遊
花陰下一別鬢毛減鏡中霜滿把

前調

次周美成韻

陳允平

草碧鋪橫野帶晚色吟鞍卸煙葭露葦滿汀鷗鷺人在
圖畫漸一聲鴈過南樓也更細雨時飄灑念徽容都消
瘦謾將紈素描寫臨鏡理殘妝依然是京兆柔雅落
葉感秋聲啼螿歎涼夜對黃花共說憔悴相思夢頓醒
西牕下兩腕玉跳脫素纖慳半把

八聲甘州

又一體雙調
凡十七字

八聲甘州

柳永

對蕭蕭暮雨灑江天一番洗清秋
漸霜風淒緊關河冷落殘照當樓
是處紅衰綠減苒苒物華休惟有長江水
無語東流 不忍登高臨遠望故鄉渺渺
歸思難收歎年來蹤跡何事苦淹留
想佳人妝樓長望誤幾回天際識歸舟
爭知我倚闌干處正恁凝眸

前調

蘇軾

有情風萬里卷潮來無情送潮歸
問錢塘江上西興浦

口幾度斜暉不用思量今古俯仰昔人非誰似東坡老
白首忘機 記取西湖西畔正暮山好處空翠煙霏
詩人相得如我與君稀約他年東還海道願謝公雅志
莫相違西州路不應回首爲我沾衣

前調

揚州次東坡錢塘韻

晁補之

謂東坡未老賦歸來天未遣公歸向西湖兩處秋波一
種飛靄澄暉又擁竹西歌吹僧老木蘭非一笑千秋事
浮世危機 應倚平山欄檻是醉翁飲處江雨霏霏送

孤鴻相接今古眼中稀
念平生相從江海任飄蓬
不遣此心違
登臨事更何須惜
吹帽淋衣

前調

歷下
立春

晁補之

謂東風定是海東來
海上最春先
乍微陽破臘
梅心已省
柳意都還
雪後南山聳翠
平野欲生煙
記得相逢日
如上林邊
莫歎春光易老
算今年春老
還有明年歎
人生難得常好
是朱顏有
隨軒金釵十二
爲醉嬌一曲
踏珠筵
功名事算何如此
花下尊前

前調

中秋前數夕
久雨方晴

向子諲

恨中秋多雨及晴時追賞且探先縱玉鉤初上冰輪未
正無恙嬋娟飲客不來自酌對影亦清妍任笑薌林老
雪鬢霜顏好在章江西畔有凌雲玉笋空翠相連嬾
崎嶇林麓則窈窕溪邊自斷此生休問願願甕中長有
酒如泉人世間是誰得似月下尊前

前調

葉夢得

問浮家泛宅自元真去後有誰來漫煙波千頃雲峰倒

影空翠成堆可是溪山無主佳處且徘徊暮雨捲晴野
落照天開老去餘生江海伴遠公香火猶有宗雷便
何妨元亮攜酒間相陪寄清談芒屨筇杖更盡驅風月
入尊疊江邨路我歌君和莫棹船回

前調

正月二
日作

葉夢得

又新正過了問東風消息幾時來笑春工多思留連底
事猶未輕回應爲瑤刀裁翦容易惜花開試向湖邊望
幾處寒梅好是綠莎新徑剩安排芳意特地重栽便

從今追賞莫暫停杯有千株深紅淺白倩緩歌急管
特相催憑看取暖煙細靄先到高臺

前調

梅

朱雍

聽琤琤漏永洗銀林梅蕊半寒收正蟾輝舒粉雲容縷
色切近妝樓人在東風竚立悄悄獨凝眸多少橫斜影
縈繞江流只有清香暗度墮髻簪珥玉曾賦清游認
瑤車冰轍佳致肯延留指蓬山丹砂初轉望滄溟羽珮
一同舟仙娥許酒澠與我消盡春愁

前調

中秋

張鎡

歎流光迅景百年間能醉幾中秋正淒蛩響砌驚鳥翻
樹煙澹蘋洲誰喚金輪出海不帶一雲浮纔上青林頂
俄轉朱樓人老歡情已減料素娥信我不爲閒愁念
幾番清夢常是故鄉留倩風前數聲橫管叫玉鸞騎向
碧空遊誰能顧黍炊榮利蟻戰仇讐

前調

壽建康帥胡
長文給事

辛棄疾

把江山好處付公來金陵帝王州想今年燕子依然認

得王謝風流只用平時尊俎彈壓萬貔貅依舊釣天夢
玉殿東頭看取黃金橫帶是明年準擬丞相封侯有
紅梅新唱香陣卷溫柔且畫堂通宵一醉待從今更數
八千秋公知否邦人香火夜半纔收

前調

夜讀李廣傳寄友

辛棄疾

故將軍飲罷夜歸來長亭解雕鞍恨灞陵醉尉匆匆未
識桃李無言射虎山橫一騎裂石響驚弦落魄封侯事
歲晚田園誰向桑麻杜曲要短衣匹馬移住南山看

風流慷慨談笑過殘年漢開邊功名萬里甚當時健者
也曾閒紗牕外斜風細雨一陣輕寒

前調

程垓

問東君既解遣花開不合放花飛念春風枝上一分花
減一半春歸忍見千紅萬紫容易漲桃溪花自隨流水
無計追隨 不忍憑高南望記舊時行處芳意菲菲歎
年來春減花與故人非縱使梁園賦猶在奈長卿老去
亦何爲空搔首亂雲堆裏立盡斜暉

前調

汪莘

惜餘春蛺蝶引春來杜鵑趣春歸算何如桃李渾無言
說開落忘機多謝黃鸝舊友相逐落花飛芳草連天遠
愁殺斜暉 誰向西湖南畔問亭臺在否花木應非看
孤山山下誰說隱君扉想錢塘春遊依舊到梨花寒食
臨舟磯尋常事不須惆悵暮雨沾衣

前調

竹西
懷古

趙希邁

寒雲飛萬里一番秋一番攪離懷向隋堤躍馬前時柳

色今度蒿萊錦纜殘香在否枉被白鷗猜千古揚州夢
一覺庭槐歌吹竹西難問擗菊邊醉著吟寄天涯指
紅樓蹤跡茅屋淅蒼苔幾傷心橋東片月趁夜潮流恨
入秦淮潮回處引西風恨又渡江來

前調

遊靈巖

吳文英

渺空煙四遠是何年青天墜長星幻蒼崖雲樹名娃金
屋殘霸宮城箭涇酸風射眼膩水淅花腥時鞞雙鴛響
廊葉秋聲宮裏吳王沉醉倩五湖倦客獨釣醒醒問

蒼天無語華髮奈山青水涵空闌干高處送飛鴉斜日
落漁汀連呼酒上琴臺去秋與雲平

前調

姑蘇臺
和韻

吳文英

步晴霞倒影洗閒愁深杯濫風漪望越來清淺吳歛杳
靄江鴈初飛輦路凌空花陰粉冷濯妝池歌舞煙霄頂
落景沉暉別是青紅闌檻對女牆山色碧澹空睂問
當時遊鹿應笑古臺非有誰招扁舟漁隱但寄情西子
却題詩閒風月暗消磨盡浪打鷗磯

前調

燈夕寄
二隱

周密

漸萋萋芳草綠江南輕暉弄春容記少年遊處簫聲巷
陌燈影簾櫳月暖烘爐戲鼓十里步香紅敲枕聽新雨
往事朦朧還是春江夢曉怕等閒愁見鴈影西東喜
故人好在水驛寄詩筒數芳程漸催花信送歸帆知第
幾番風空吟想梅花千樹人在其中

前調

題疎
寮圖

周密

信山陰道上景多奇仙翁幻吟壺愛一丘一壑一花一

草窈窕枝疎染就春雲五色更種玉千株咳唾騷香在
四壁驪珠 曲折冷紅幽翠涉流花澗淨步月堂虛美
風流魚鳥來往賀家湖認秦鬟越妝窺鏡倚斜陽人在
會稽圖圖多賞池香洗硯山秀藏書

前調

張炎

倚危樓一笛翠屏空萬里見天心度野光清峭晴峰湧
日冷石生雲簾捲小亭虛院無地不花陰徑曲知何處
春水泠泠 嘯傲柴桑影裏且怡顏莫問誰古誰今任

燕留鷗住聊復慰幽情
愛吾廬點塵難到好林泉
都付與閒人還知否
元來卜隱不在山深

前調

寄李筠房

張炎

望娟娟一水隱芙蓉
幾被暮雲遮正凭高
送目西風斷鴈殘月
平沙未覺丹楓盡老
搖落已堪嗟無避秋聲處
愁滿天涯
一自盟鷗別後甚酒瓢
詩錦輕誤年華諒荷衣
初暖不忍負煙霞
記前度翦燈一笑再相逢
知在那人家
空山遠白雲休贈只贈梅花

前調

張炎

記當年紫曲戲分花
簾影最深深
聽惺惚語笑香尋古
字譜
掐新聲
散盡黃金歌舞
那處著春情
夢醒方知夢
夢豈無憑
幾點別餘清淚
盡化作妝樓斷雨
殘雲
指梢頭舊恨
豆蔻結同心
都休問
北來南去
但依依同是
可憐人
還飄泊
何時尊酒
却說如今

前調

陸起潛
皆山樓

張炎

俯長空不占洞庭波
山拔地形高
對扶疎古木
浮圖倒

影勢壓雄濤門掩翠微僧院應有月明敲物換堂安在
斷碣閒拋 不識廬山真面是誰將此屋突兀林坳上
層臺回首萬境入詩豪響天心數聲長嘯任清風吹頂
鬢蕭騷凭闌久青琴何處獨立瓊瑤

前調

張炎

聽江湖夜雨十年燈孤影尚中洲對荒涼茂苑吟情渺
渺心事悠悠見說寒梅猶在無處認西樓招取樓邊月
回載扁舟 明日琴書何處正風前墜葉草外聞鷗甚

消磨不盡惟有古今愁總休問西湖南浦漸春來煙水
接天流清遊好醉招黃鶴一嘯高秋

前調

錢友

張炎

記玉關踏雪事清遊寒氣敝貂裘傍枯林古道長河飲
馬此事悠悠短夢依然江表老淚灑西州一字無題處
落葉都愁載取白雲歸去問誰留楚佩弄影中洲折
蘆花贈遠零落一身秋向尋常野橋流水待招來不是
舊沙鷗空懷感有斜陽處最怕登樓

前調

趙文

是去年春草又萋萋塵生縷金衣悵朱顏爲土白楊堪
柱燕子誰依謾說漫漫六合無地著相思遼鶴歸來後
城亦全非更有延平一劍向風雷半夜何處尋伊怪
天天何物堪作玉彈棋到年年無腸堪斷向清明獨自
掩荆扉何況又禽聲杜宇花事酴醾

前調

張翥

向芙蓉湖上駐蘭舟淒涼勝事稀但西泠橋外北山堤

欽定四庫全書

御選歷代詩餘
卷六十二

三十

畔殘柳依依追憶煙花舊夢回首冷煙霏惟有盟鷗好
時傍人飛聽取紅筵象板儘歌回彩扇舞換仙衣正
白蘋風急吹雨暗斜暉空惆悵離懷未展更酒邊忍又
送將歸江南客此生心事只在漁磯

前調

張 埜

憶湖光醉別幾春秋飄泊寓京師恨無窮煙水無情歲
月無限相思萬里風沙夢覺山色碧參差忙對玻璃鏡
照我塵姿欲寫從前離閣便安排畫舸準備新詩見

六橋遺構煙雨強撐支怨東風紅消翠減比向來渾是
老西施如何得劉郎雙鬢長似當時

前調

曉發

陸釋麟

曉風清濫濫待潮生潮落始行舟正雞聲茅店孤城斷
角歌枕悠悠偶爾掀篷一笑起舞也風流問誰人領取
此景清幽極目長空杳靄但寒煙衰草江練明樓羨
雙雙白羽天水共沉浮待乘桴漸窮湖海莫思量錦纜
與鳴騶菰蒲裏煙波釣叟與子爲儔

欽定四庫全書

御選歷代詩餘
卷六十二

三十

御選歷代詩餘卷六十二

欽定四庫全書

御選歷代詩餘卷六十三目錄

九十
七字

迷神引

柳永
二首

朱雍

帝臺春

劉基

葛一龍

水調歌頭

又一體

何夢桂

聲聲慢

又一體

宋徽宗

二首

趙長卿

二首

李彌遜

辛棄疾

吳潛

吳文英

四首

蔣捷

周密

三首

王沂孫

四首

張炎

五首

史可堂

尹濟翁

張翥

前調又一體

賀鑄

曹組

前調又一體

劉涇

高觀國

李演

陳郁

蔡松年

張翥

前調

又一體

李清照

醉蓬萊

又一體

柳永

黃庭堅

葛勝仲

謝邁

万俟雅言

呂渭老

陳瓘

葉夢得

趙長卿

二首

楊无咎

趙礪老

趙彥端

劉圻父

前調

又一體

蘇軾

暗香

姜夔

趙以夫

吳文英

陳允平

張炎

三首

御選歷代詩餘卷六十三目錄

欽定四庫全書

御選歷代詩餘卷六十三

九十
七字

司經局洗馬掌局事兼翰林院修撰加二級臣王奕清奉

旨校刊

迷神引

雙調九

十七字

迷神引

柳永

一葉扁舟輕帆捲暫泊楚江南
岼孤城早角引金笳怨

水茫茫平沙鴈旋驚散煙斂寒林簇畫屏展天際遙山
小黛眉淺舊賞輕拋到此成遊宦覺客程勞年光晚
異鄉風物忍蕭索當愁眼帝城賒秦樓阻旅魂亂芳草
連空闊殘照滿佳人無消息斷雲遠

前調

柳永

紅板橋頭秋光暮澹日映煙方煦寒溪蘸遠碧垂楊路
重分飛攜纖手淚如雨波急隋堤遠片帆舉倏忽年華
改尚期阻暗覺春殘漸漸飄花絮好夕良天長辜負

洞房閒掩小屏空
無心處指歸雲仙鄉杳在何處遙夜
香衾暖算難與知他深深約記得否

前調

梅

朱雍

白玉樓高雲光繞
望極新蟾同照前邨暮雪霽梅林道
澗風平波聲渺喜登眺影寒枝裊
歎春早臨水凝清淺靚妝巧
瘦體傷離向此縈懷抱
覺璧華輕冰痕小倦聽寒管轉
嗚咽令人老素光回長亭靜無塵到煙鎖
橫塘暖香徑悄飛英難拘束任春曉

帝臺春

雙調九十七字，亮山堂外紀載後。
唐李璟賦春恨，帝臺春調名始此。

帝臺春

劉基

涼雨新沐，秋花徧牆角。門對遠山山帶斜陽，葱蘢相屬。
明月今宵已自滿，又爭奈、素娥幽獨。向天涯、望月興懷，
愁多如簇。年歲促，歡去速。意易足，事難續。鏡掩嬾重，
開縱春風也，不解染黃成綠。隴首孤雲去，無際草上露。
華白如玉，且深下紅簾，倒金尊醺醖。

前調

葛一龍

秋氣漸慄秋聲砭人骨憔悴綺年添却無端風騷倩逸
怕送扁舟還浦去不曾問紫萸芽茁又誰知爾尚遲留
我先行役 歌鐘急吟裊濕雲樹鬱暮帆出正足練澄
江月來時也領略一天蕭瑟故苑池塘撇下了露冷笑
蓉暗垂泣莫笑我疎狂把別離輕忽

水調歌頭

又一體雙調
九十七字

水調歌頭

何夢桂

倚闌干立盡看東風吹度柳絲飛怕杜鵑啼殺江南鴈
杳游子何之夢斷揚州芍藥落盡簇紅絲歌吹今何在
一曲霓衣往事不堪重省記柳邊深巷花外幽墀把
菱花獨照脂粉總慵施悵春歸留春未住奈春歸不管
玉顏衰傷心事都將分付榆砌苔磯

聲聲慢

又一體雙調
九十七字

聲聲慢

宋徽宗

宮梅粉澹，岼柳金勻，皇州乍慶春回。鳳闕端門，鰲山綵
締蓬萊，沉沉洞天向晚。寶輿還花滿鈞臺，輕煙裏、算誰
將金蓮陸地，齊開。是處笙歌鼎沸，雕鞍趁金輪隱隱，
輕雷萬家羅幕。千步錦繡相挨，銀蟾夜色如畫。共乘歡
怎忍歸來，疎鐘斷聽行歌，猶在禁街。

前調

宋徽宗

欺寒衝暖，占早爭先，江梅又報南枝。暗香浮動，偏宜映

月臨池天然素肌瑩骨笑等閒桃李芳菲勞夢想似玉
人羞嬾弄粉妝遲 常恐行歌聲斷猶堪恨無情塞管
輕吹寄遠叮嚀相贈隴首雲飛前邨夜來雪裏殢東君
須索饒伊爛漫也算百花猶自未知

前調

草

趙長卿

濃芳滿地秀色連天和煙帶雨萋萋幾許芳心還解報
得春暉當時謝郎夢裏似慙慙傳與新詩却爲甚動長
門怨感南浦傷離 追想天涯行客應解擁車輪步步

相隨惆悵如絲正是欲斷腸時憑高望中不見路悠悠
南北東西春去也怨王孫猶自未歸

前調

柳

趙長卿

金垂煙重雪颺風輕東風慣得嬌柔秀色依依偏應綠
水朱樓腰肢先來太瘦更着尖惹得閒愁牽情處是張
郎年少一種風流別後長堤目斷空記得當時馬上
牆頭細雨輕煙何處夕繫扁舟丁寧再須折贈勸狂風
休挽長條春未老到成陰終待共遊

前調

木樨

李彌遜

龍涎燒就沈水熏成分明亂屑瓊瑰一朶才開人家十
里先知此花大即不大有許多瀟灑清奇較量盡謂勝
如茉莉趁得荼蘼更被秋光掇送微放些月照著陣
風吹惱殺多情猛判沉醉酬伊朝朝暮暮守定儘忙時
也不相離睡夢裏膽瓶兒枕畔數枝

前調

旅次登樓作

辛棄疾

征埃成陣行客相逢都道幻出層樓指點檐牙高處浪

湧雲浮今年太平萬里罷長淮千騎臨秋凭欄望有東
南佳氣西北神州 千古懷嵩人去還笑我身在楚尾
吳頭看取弓刀陌上車馬如流從今賞心樂事剩安排
酒令詩籌華胥夢願年年人似舊游

前調

和吳夢
窓賦梅

吳潛

揆晴撈暖載酒呼朋夷猶東園西園綠萼枝頭兩三初
破輕寒平生自甘寂寞占冷妝不爲人妍林逋去問影
疎香暗誰賦其間 空想故山奇事正煙橫嶺曲月浸

溪灣杏錯桃訛那時青子都圓惟曉夢窓知處對翠禽
依約神仙休引角怕征人淚落塞邊

前調

和沈時齋八
日登高韻

吳文英

憑高入夢搖落關情寒香吹盡空巖墜葉消紅欲題秋
信難緘重陽正隔殘照趁西風不響雲尖乘半暝看殘
山灌翠剩水開匳暗省長安年少幾傳杯弔甫把菊
招潛身老江湖心隨飛鴈天南烏紗倩誰重整映風林
鈎玉纖纖漏聲起亂星河影入畫簷

前調

梅蘭瑞
香水仙

吳文英

雲深山塢煙冷江皋人生未易相逢一笑燈前釵行兩
兩春容清芳夜爭真態引香生撩亂東風探花手與安
排金屋懊惱司空 憔悴欹翹委佩恨玉奴消瘦飛趁
輕鴻試問知心尊前誰最情濃連呼紫雲伴醉小丁香
纔吐微紅還解語待攜歸行雨夢中

前調

宏菴席上姬
親剥桐子

吳文英

寒簫驚墜香豆初收銀牀一夜露深亂寫明珠金盤來

薦清斟綠窓細剥檀皺料水晶微損春簪風韻處惹三
香酥潤櫻口脂侵重省追涼前事正風吟莎井月碎
苔陰顆顆相思無情漫攪秋心銀臺翦花杯散夢阿嬌
金屋沉沉甚時見露拾香釵燕墜金

前調

閨重九
飲郭園

吳文英

檀欒金碧婀娜蓬萊游雲不蘸芳洲露菊霜蓮十分點
綴殘秋新彎畫眉未穩似含羞低度牆頭愁送遠駐西
臺車馬共惜臨流知道池亭多宴掩庭花長是驚落

秦謳膩粉闌干猶聞凭袖香留輸他翠漣拍甃瞰新妝
終日凝眸簾半捲帶黃花人在小樓

前調

秋聲

蔣捷

黃花深巷紅葉低窓淒涼一片秋聲豆雨聲來中間夾
帶風聲疎疎二十五點麗譙門不鎖更聲故人遠問誰
搖玉珮簷底鈴聲彩角聲吹月墜漸連營馬動四起
笳聲閃爍鄰燈燈前尚有砧聲知他訴愁到曉碎嚶嚶
多少蛩聲訴未了把一半分與鴈聲

前調

桂菊
秋荷

周密

妝額黃輕舞衣紅淺西風又到人間小雨新霜萍池蘚
徑生寒輸他漢宮姊妹粲星鈿露佩珊珊涼意早正金
盤露潔翠蓋香殘 三十六宮秋色好扶疎仙影伴月
長閒寶絡風流何如細蕊堪餐幽香未應便減傲清霜
正自宜看吟思遠負東籬還賦小山

前調

周密

橙香小院桂冷閒庭西風鴈影涵秋鳳撥龍槽新聲小

按梁州鶯吭夜深轉巧礙涼雲應爲歌留慵顧曲歎周
郎老去鬢改花羞何事登臨感慨倩金蕉一洗千古
清愁屢舞高歌作成陶謝風流人生最難一笑擽尊前
醉倒方休待醉也帶黃花須插滿頭

前調

柳絮

周密

燕泥沾粉魚浪吹香芳堤十里新晴靜惹游絲花邊裊
裊扶春多憐此時漂泊記章臺曾挽青青堪愛處是撲
簾嬌軟隨馬輕盈長是河橋三月做一番晴雪惱亂

詩魂帶雨沾衣羅襟點點離痕休綴潘郎鬢影怕綠窗
年少人驚捲春去翦東風千縷碎雲

前調

王沂孫

高寒戶牖虛白尊疊千人盡入孤光玉影如空天葩暗
落清香平生此興不淺記當年獨據胡牀怎知道是歲
華換却處處堪傷已是南樓曲斷縱疎光淡月也只
淒涼冷雨斜風何況獨掩西窓天涯故人縱老漫相思
永夜相望斷夢遠趁秋聲一片渡江

前調

王沂孫

迎門高髻倚扇清吭娉婷未數西洲淺拂朱鉛春風二
月梢頭相逢靚妝俊語有舊家京洛風流斷腸句試重
拈綵筆與賦閒愁 猶記凌波斷去問明璫羅襪却爲
誰留枉夢相思幾回南浦行舟莫辭玉尊起舞怕重來
燕子空樓漫惆悵抱琵琶閒過此秋

前調

催雪

王沂孫

風聲怨思雲意商量連朝滕六遲疑茸帽貂裘兔園準

擬吟詩紅爐旋添獸炭辦金船羔酒溶脂問翦水僮工
夫猶未還待何時 休被梅花爭白好誇奇鬪巧早徧
瓊枝綵索金鈴佳人等塑獅兒怕寒繡帷慵起夢梨雲
說與春知莫誤了約王猷船過剡溪

前調

王沂孫

啼螳門靜落葉堦深秋聲又入吾廬一枕新涼西窓晚
雨疎疎舊香舊色換却但滿川殘柳荒蒲茂陵遠任歲
華荏苒老盡相如 昨夜西風初起想尊邊呼櫂橋後

思書短景淒然殘歌空扣銅壺當時送行共約鴈歸時
人賦歸與鴈歸也問人歸如鴈也無

前調

張炎

平沙籠曉野水驚寒遙岑寸碧煙空萬里冰霜一夜換
却西風晴梢漸無墜葉撼秋聲却是梧桐情正遠奈吟
湘賦楚近日偏慵客裏依然清事憂窓深帳暖戲揀
香筒片霎歸程無奈夢與心同空教故林怨雀掩閒門
明月山中春又小甚梅花猶自未逢

前調

張炎

穿花省路傍竹尋鄰如何故隱都荒問取堤邊因甚減
却垂楊消磨縱然未盡滿煙波添了斜陽空歎息又翻
成無限杜老淒涼 一舸清風何處把秦山晉水分貯
詩囊髮已飄蕭休問歲晚空江松陵試招舊隱怕白鷗
猶識清狂漸邈遠望并州却是故鄉

前調

西湖

張炎

晴光轉柳曉氣分嵐何人野渡橫舟斷柳枯蟾涼意正

滿西州匆匆載花載酒便無情也自風流芳晝短奈不堪
秋夜秉燭來遊誰識山中朝暮向白雲一笑今古
無愁散髮吟商此興萬里悠悠清狂未應似我倚高寒
隔水呼鷗須待月許多清都付與秋

前調

張炎

因風整帽借柳維舟休登故苑荒臺去歲何年遊處半
入蒼苔白鷗舊盟未冷但寒沙空與愁堆漫歎息問西
風灑淚不忍徘徊眼底江山如在把冰絃彈斷苦憶

顏回一點歸心分付布韞青鞵相尋已期到老那知人
如此情懷悵望久海棠開依舊燕來

前調

寄友

張炎

百花洲畔十里湖邊沙鷗未許盟寒舊隱琴書猶記渭
水長安蒼雲數千萬疊却依然一笑人間似夢裏對青
尊白髮秉燭更闌 渺渺煙波無際喚扁舟欲去且與
憑闌此別何如能消幾度陽關江南又聽夜雨怕梅花
零落孤山歸最好甚閒人猶自未閒

前調

史可堂

羞朱妒粉，染霧裁雲，澹然蒼佩。仙裳半額，風妝莫道梳洗家常。碧羅亂縈小帶，翠虬寒一架，春香清思，苦倚晴嬌無力，如侍韓郎。
密幄籠芳吟夜，任露沾輕袖，月轉空梁。弱骨柔姿，偏解勾引詩狂。遺鈿碎金滿地，恨無情風送韶光。閒晝永，看青青垂幔，過牆。

前調

禁釀

尹濟翁

雕鞍芳徑，翠管長亭，春醒不負年華。幾丈閒愁，寄風吹

落天涯深深小簾朱戶是何人重整香車愁未醒記竹
西歌吹柳下人家 睂鎖何曾舒展看行人都是醉眼
橫斜寄語高陽從今休喚流霞殘春又能幾許但相從
評水觀茶清夢遠怕東風猶在杏花

前調

楊州第工以虞
學士詞求賦

張翥

金鑾學士天上歸來蘭舟小駐蕪城供奉新詞幾度慣
賦鳴箏相逢沈郎絕藝爲尊前細寫餘情問何似似秦
關鴈度楚樹蟬鳴 我亦從來多感但登山臨水慷慨

愁生一曲哀彈只遣鴉變魂驚行期買花載酒趁秋高
月朗風清須盡醉聽江頭腸斷數聲

前調

又一體

賀鑄

園林幕翠燕寢凝香華池繚繞飛廊坐按吳娃清麗楚
調圓長歌闌橫流美眇乍疑生綺席輝光文園屬意玉
觴交勸寶瑟高張南薰難消幽恨金徽上殷勤彩鳳
求凰便訴卷收行雨不戀高唐東山勝遊在眼待紉蘭
擷菊相將雙棲安穩五雲溪是故鄉

前調

曹組

重檐飛峻麗綵橫空繁華壯觀都城雲母屏開八面人
在青冥憑欄瑞煙深處望皇居遙識蓬瀛回環閣道五
花相鬪壓盡旗亭歌酒長春不夜金翠照羅綺笑語
盈盈陸海人山輻輳萬國歡聲登臨四時總好況花朝
月白風清豐年樂歲熙熙且醉太平

前調

又一體

劉涇

梅黃金重雨細絲輕園林煙霧如織殿閣風微簾外燕

喧鶯寂池塘綠鴛鴦戲水露荷翻千點珠滴閒晝永稱瀟
湘竿叟爛柯仙客日午槐陰低轉茶甌罷清風頓生
雙腋碾玉盤深朱李靜沉寒碧朋儕閒歌白雪卸紗巾
尊俎狼籍有皓月照黃昏眠又未得

前調

高觀國

壺天不夜寶炬生香光風蕩搖金碧月灩水痕花外峭
寒無力歌傳翠簾盡捲誤驚回瑤臺仙跡禁漏促攆千
金一刻未酬佳夕捲地香塵不斷最得意輸他五陵

狂客楚柳吳梅無限眼邊春色
鮫綃暗中寄與待重尋
行雲消息乍醉醒怕南樓吹斷
曉笛

前調

問梅
孤山

李演

輕鞦繡谷柔屐煙堤六年遺賞
新續小舫重來惟有寒
沙鷗熟徘徊舊情易冷但溶溶
翠波如縠愁望遠甚雲
銷月老暮山自綠
顰笑人生悲樂且聽我尊前漁歌
樵曲舊閣塵封長得樹陰如屋
淒涼五橋歸路載寒秀
一枝疎玉翠袖薄晚無言空倚
脩竹

前調

賞芙蓉
木犀

陳郁

澄空初霽暑退銀塘冰壺鴈程寂寞天闕清芬何事早
飄巖壑花神更裁麗質漲江波一匳梳掠涼影裏箕素
娥仙隊似曾相約閒把雨花商略開時候羞趁觀桃
階藥綠幙黃簾好頓膽瓶兒著年年粟金萬斛拒嚴霜
錦絲圍幄秋富貴又何妨與民同樂

前調

蔡松年

青蕪平野小雨千峰還成暮徑寒色裁翦雲窓憶得伴

人良夕遙憐幾重眉黛恨相逢少於行役梨花淚正宮
衣春瘦曉紅無力 應怪浮雲夫壻不解趁新醅醉眠
涼月怨入關河西去又傳音息誰知倦遊心事向來辛
苦思泉石人未老約閭峰多占秀碧

前調

九日賞菊值
海棠盛開

張翥

西風墜綠喚起春嬌嫣然困倚脩竹落帽人來花豔乍
驚郎目相思尚帶舊恨甚淒涼未忺妝束吟鬢底俾寒
香一朶並簪黃菊 却待金盤華屋園林靜多情怎禁

幽獨蛺蝶應愁明日落紅難觸那堪鴈霜漸重怕黃昏
欲睡未足翠袖冷且莫辭花下秉燭

前調

又一體

宋媛

李清照

尋尋覓覓冷冷清清悽悽慘慘戚戚乍暖還寒時候最
難將息三杯兩盞澹酒怎敵他晚來風急鴈過也正傷
心却是舊時相識滿地黃花堆積憔悴損如今有誰
堪摘守著窗兒獨自怎生得黑梧桐更兼細雨到黃昏
點點滴滴這次第怎一箇愁字了得

醉蓬萊

又一體雙調
九十七字

醉蓬萊

慶老人
星現

柳永

漸亭皋葉下隴首雲飛素秋新霽華闕中天鎖葱蔥佳
氣嫩菊黃深拒霜紅淺近寶階香砌玉宇無塵金莖百
露碧天如水 正值昇平萬幾多暇夜色澄鮮漏聲迢
遞南極星中有老人呈瑞此際宸遊鳳輦何處度管弦
清脆太液波翻披香簾捲月明風細

前調

黃庭堅

對朝雲鬢黷暮雨霏微翠峰相倚巫峽高唐鎖楚宮佳
麗畫戟移春靚妝迎馬向一川都會萬里投荒一身弔
影成何歡意盡道黔南去天尺五望極神州萬重煙
水尊酒公堂有中朝佳士荔頰紅深麝臍香滿醉舞裊
歌袂杜宇催人聲聲到晚不如歸是

前調

天寧
節作

葛勝仲

望葱葱佳氣虹渚祥開斗樞光繞析木天津正靈暉騰

照鷺綴分班象胥交貢奉御觴清曉玉殿寒輕金徒漏
永瑞爐煙裊萬寓均歡示慈頒燕壽祝南山慶均鳧
藻縹緲紅雲望九重天表舞獸鏘洋抃鼇欣戴度管弦
聲杳歷草常新蟠桃永秀與天難老

前調

中秋懷
無逸兄

謝邁

望晴峰染黛暮靄澄空碧天無漢圓鏡高飛又一年秋
半皓色誰同歸心暗折聽唳雲孤鴈問月停杯錦袍何
處一尊無伴好在南鄰詩盟酒社刻燭爭成引觴愁

緩今夕樓中繼阿連清翫飲劇狂歌歌終起舞醉冷光
零亂樂事難窮疎星易曉又成浩歎

前調

万俟雅言

正波翻銀漢漏滴銅壺上元佳致絳燭銀燈若繁星連
綴明月逐人暗塵隨馬盡五陵豪貴鬚惹烏雲裙拖湘
水誰家妹麗金闕南邊綠山北面接地綺羅沸天歌
吹六曲屏開擁三千珠翠帝樂庭深鳳爐煙噴望舜顏
瞻禮太平無事君臣宴樂黎民歡醉

前調

呂渭老

任落梅鋪綴鴈齒斜橋裙腰芳草閒伴遊絲過曉園庭
沼廝近清明雨晴風軟稱少年尋討碧縷牆頭紅雲水
面柳堤花島誰信而今怕愁憎酒對著花枝自疎歌
笑鶯語丁寧問甚時重到夢筆題詩帕綾封淚向鳳簫
人道處處傷心年年遠念惜春人老

前調

陳瓘

問東州何處境勝人幽兩俱難得狼山相望有高堂千

尺妙曲轟空綠雲翻袖奏壺天長日笑我飄然蓬窓竹
戶只延山色擬掉觥船徑衝花浪直造瑤筵共醺仙
液仍乞蟠桃向廬山親植未舉江帆早逢淮鴈問故人
蹤跡遠老池邊陶翁琴裏此情何極

前調

葉夢得

問東風何事斷送殘紅便揀歸去牢落征途笑行人羈
旅一曲陽關斷雲殘靄做渭城朝雨欲寄離愁綠陰千
轉黃鸝空語遙想湖邊浪搖空翠絃管風高亂花飛

絮曲水流觴有山翁行處翠袖朱欄故人應也弄畫船
煙浦會寫相思尊前爲我重翻新句

前調

新荔枝

趙長卿

正火山槐夏黛葉細枝荔子新摘千里馳驅薦仙源佳
席浪比龍睛未輸嵯蜜燦爛然紅滴滿貯雕盤纖纖素
手丹苞新擘 梨栗麤疎帶酸橘柚凡品多般總羞標
格何似濃香洗煩襟仙液爲愛真妃再三珍重價傾城
傾國玉骨冰肌風流蘊藉直宜消得

前調

郡圃芍藥

趙長卿

是三春已暮，浪蕊雕殘，牡丹零落，獨殿清和有佳名芍藥。淺淺芳叢，繡幢鼎鼎，更豔香綽約。渾似揚州畫樓捲起翠簾紅幕。倚檻輕盈萬嬌千媚，故整霞裾，笑花寂寞。冥太守風流擁笙歌圍著，坐上詩人二千里外念此身飄泊。客眼看花歸心對酒，翻成蕭索。

前調

茶

楊无咎

見禾山凝秀，禾水澄清，地靈境勝，天與珍奇，產凌霄峰。

頂嫩葉森槍輕塵飛雪冠中州雙井絕品家藏武陵有
客清竒相稱坐列羣賢手呈三昧雲逐甌圓乳隨湯
迸珍重殷勤念文園多病毛孔生香舌根回味助苦吟
幽興兩腋風生從教飛到蓬萊仙境

前調

壽葉
樞密

趙礪老

聽都人歌詠便起金甌再登元老山色溪聲與春風齊
到補袞工夫望梅心緒見丹青重好鵲喜晴空燈迎誕
夕槐堂歡笑正是元宵滿天和氣璧月流光雪消寒

峭今夜今年表千秋同照萬象森羅一匝清瑩影山河
多少玉燭調新彩睂常喜寰瀛春曉

前調

梅

趙彥端

向蓬萊雲渺姑射山深有春長好香滿枝南笑人間驚
早試問寒柯鏤冰裁玉費化工多少東閣詩成西湖夢
覺幾番清曉 好是羅幃麝溫屏暖却恨煙邨雨愁風
惱一一清芬爲東君傾倒待得明年翠陰青子蔭鳳凰
池沼更把陽和從頭付與繁花芳草

前調

郡城芍藥

劉圻父

訪鶯花陳迹姚魏遺風綠陰成幄尚有餘香付寶階紅
藥淮海維揚物華天產未覺輸京洛時出新妝施朱傅
粉依然相若束素腰纖捻紅脣小障袖嬌羞倚闌柔
弱玉佩瓊琚勸王孫行樂況是韶華爲伊挽駐未放離
情薄顧盼堦前留連醉裏莫教零落

前調

又一體
重九

蘇軾

笑勞生一夢羈旅三年又還重九華髮蕭蕭對荒園搔

首賴有多情好飲無事似古人
賢守歲歲登高年年落
帽物華依舊 此會應須爛醉仍把紫菊茱萸細看重
顰搖落霜風有手栽雙柳來歲今朝爲我西顧酹羽觴
江口會與州人飲公遺愛一江醇酎

暗香

宋姜夔自度詠梅之作雙
調九十七字亦名紅情

暗香

石湖
詠梅

姜夔

舊時月色算幾番照我梅邊吹笛喚起玉人不管清寒

與攀摘何遜而今漸老都忘却春風詞筆但怪得竹外
疎花香冷入瑤席 江國正寂寂歎寄與路遥夜雪初
積翠尊易泣紅萼無言耿相憶長記曾攜手處千樹壓
西湖寒碧又片片吹盡也幾時見得

前調

梅

趙以夫

冰花炯炯記那回占斷春風黿頂獨抱寒香得意西湖
酒初醒爲問玉堂富貴爭得似山中深靚向歲晚竹翠
松蒼閒伴一枝冷 南溟水萬頃想月濕斷磯雲弄疎

影粉英落盡孤鶴長鳴夜方永將見青青如豆又迤邐
傳黃風景聽報道催去也再調玉鼎

前調

吳文英

縣花誰葺記滿庭燕麥朱扉斜闔妙手作新公館青紅
曉雲濕天際疎星趁馬畫簾隙冰絃三疊盡換却吳水
吳煙桃李靚春靨風急送帆葉正鴈水夜清卧虹平
帖輓紅路接塗粉闌深早催入懷暖天香宴裏花隊簇
輕軒銀牋便問訊湖上柳兩堤翠匝

前調

次姜白石
石韻

陳允平

霽天秋色正倚樓待月誰伴橫笛漲綠浮空閒數河星
手堪摘彌望澄光練淨分付與元暉才筆煙淑閣雲遠
波平歸鳥趁風席南國信音寂悵鴈渚渡閒鷺汀沙
積蘚碑露泣時拊遺蹤暗嗟憶人事空隨逝水今古但
雙流一碧待辦取蓑共笠小舟泛得

前調

荷花

張炎

無邊香色記涉江自采錦機雲密翦翦紅衣學舞波心

舊曾識一見依然似語流水遠幾回空憶看亭亭倒影
窺妝玉潤露痕濕閒立翠屏側愛向人弄芳背酣斜
日料應太液三十六宮土花碧清興後風更爽無數滿
汀洲如昔汎片葉煙浪裏卧橫紫笛

前調

送杜景齊
歸永嘉

張炎


猗蘭聲歇抱孤琴思遠幾番彈徹洗耳無人寂寂行歌
古時月一笑東風又急黯消魂恨聽啼鳩想少陵還歎
飄零遣興在吟篋愁絕更離別待款語遲留賦歸心

切故園夢接花暗閒門掩飛蝶重訪山中舊隱有羈懷
未須輕說莫相忘堤上柳此時共折

前調

張炎

羽音寂寞怪虛簾晝悄近來無鵲水葉吹寒極目凝思
倚江閣不信相如便老猶未減當時行樂但趁他鬪草
籌花終是帶離索憶昨更情惡漫認著梅花是君還
錯石牀冷落閒埽松陰與誰酌一自飄零去後輕悞了
燈前深約從到此歸未得幾曾忘却



御選歷代詩餘卷六十三